

LA STAZIÙUN

**Sa ga fée càs,
quand sa trovii in staziùn,
sii curiùs 'me 'n San Tumàas
a guardà sta prucessiùn.**

**S'an véed da tutt i culùur,
négar, giàld, giòvin, vécc,
gent lüstra 'mè 'n fatùur
e tanti, vestii da pécc.**

**A l'è 'mè 'n calderùn,
chi vèn e chi và.
Gnintün gh'ha 'na destinaziùn,
chi par i piasé e chi par tribülà.**

**Sa pàrta tanti linguagg,
sa sènt tanti dialètt,
un quaivün setàa s'un sàcch
cùì sò penséer a specià 'l dirètt.**

**E quand ul campanèll al sa métt a sunà,
l'è 'mè 'n furmighée,
chi piàng, chi sa salüda, chi vöör basà,
quij dul sacch in levà in pée.**

**E quand tùcc han ciapà pòst
e 'l càp staziùn al vàlza sü 'l palétt,
a 'n quài vüün ga vèen un grôpp
e 'l svèntula 'l fazulétt.**

**E quànd ul trénu al sa sluntàna
da diventà 'n puntiin a l'urizùnt,
altra gènt, 'n'altra sciàma,
l'è la vita du la staziùn.**